

小方壺齋

小方壺齋

征廓爾喀記

邵陽魏 源著

四川雲南之西爲烏斯藏烏斯藏之西南爲廓爾喀廓爾喀之西南爲五印度印度古佛國在葱嶺西南
瀕大海去烏斯藏尙遠或以烏斯藏卽古佛國者非也自四川打箭鑪西行二十餘驛至前藏四十二驛
至中藏又十二驛至後藏又十二驛至濟隴又三十驛至石宿堡爲後藏極邊地踰橋而西則廓爾喀矣
廓爾喀本巴勒布國舊分葉楞部布顏部庫木部於雍正九年各奏金葉表文貢方物後三部合併爲一
遂與後藏鄰自古不通中國其與中國構兵則自乾隆五十五年內犯西藏始初後藏班禪刺麻以四十
六年來朝祝○○高宗八旬嘏中外施舍海溢山積及班禪卒於○京師資送歸藏其財皆爲其兄仲
巴呼圖克圖所有旣不布施各寺廟與唐古忒之兵又攢其弟舍瑪爾巴爲紅教不使分惠於是舍瑪爾
巴憤懣廓爾喀以後藏之封殖仲巴之專汰煽其入寇五十五年廓爾喀藉商稅增額食鹽糴土爲詞興
兵闖邊唐古忒兵不能闕而○朝廷所遣援剿之侍衛巴忠將軍鄂輝成德等復調停賄和陰令西藏堪
布等私許歲幣萬五千金按兵不戰遽以賊蹙乞降飾奏而諷廓爾喀酋入貢受封國王廓爾喀旣侮藐
內地次年藏中歲幣復爽約於是廓爾喀以責負爲名再舉深入後藏札什倫布西南左有曲多江鞏右
有彭錯嶺峭壁連岡咽喉天險賊步卒數千自聶拉木入其時蕃漢官兵若分兩路一扼曲多江鞏遏其
前一繞赴彭錯嶺截其後則廓爾喀深入無援可不戰潰也駐藏大臣保泰一聞賊至則移班禪於前藏
并請移達賴班禪於西甯欲以藏地委賊且札什倫布寺負山面江形勢鞏峻刺麻數千乘墉可守以待
援而仲巴呼圖克圖挈貲先逸刺麻濟仲札蒼等復託言卜諸吉祥天母不宜戰眾心遂潰賊大掠札什
倫布全藏大震兩大刺麻飛章告急侍衛巴忠扈○○駕熱河聞變畏罪自沈水死時鄂輝爲四川總督
成德爲四川將軍因盡以罪委之謂巴忠解唐古忒語故私議皆其一人所爲己二人不知也及奉○○

命赴藏勦禦又按程緩進○○上知二人不足恃乃○○命嘉勇公福康安爲將軍超勇公海蘭察參贊調索倫滿兵及屯練土兵進討其軍餉則藏以東川督孫士毅主之藏以西駐藏大臣和琳主之濟隴邊外則前川督惠齡主之賊狙於上年賄和之役半運所掠歸國半屯界不去鄂輝成德等遂奏賊退欲卽以藏事○○上切責不許明年二月將軍參贊由青海至後藏四月連敗其屯界之賊盡復藏地六月遂大舉深入恐賊繞襲後路遣領隊大臣成德岱森保及總兵諸神保各出左右一路以分賊勢而大軍出中路海蘭察將三隊爲前軍福康安將二隊繼之賊據木古拉山阻水拒險將軍議令護軍統領台斐英阿與賊相持而大軍別趨間道海蘭察繞山後出賊營之上福康安由間道合衝賊營共克木柵石卡數十追奔至雍雅而成德諸神保亦克鐵索橋進會利底廓夷舉國震懾遣使詣軍前乞降將軍參贊嚴檄斥之七月再進六戰六捷殺賊四千涉賊境七百餘里將近其國都陽布之地隔河大山賊以十營踞山巖守水深山斗絕山後卽其國都也福康安欲逾橋攻之海蘭察力持不可福康安自引兵渡橋仰攻果不利賴海蘭察接應退賊方是時其國境南鄰印度之地久爲英吉利屬國與廓夷積釁聞廓夷受兵於中國則亦出兵攻其邊鄙廓夷兩支強大敵洵懼無計且恐我軍聞而氣奮也再遣人詣軍卑詞乞哀將軍參贊議以賊境益險而踰八月卽大雪封山不可老師乃允其降盡獻還所掠藏中財寶及金塔頂金冊印歸前被執之丹津班珠爾并獻沙瑪爾巴之尸貢馴象番馬樂工請永遵約束班師○○上本欲俟事平裂其土受諸土司而酬福康安以郡王爵及聞已受降乃允其請留番兵三千漢蒙古兵一千戍藏是爲官兵駐藏之始後藏至廓爾喀故有孔道賊嚴守之故我師覓間道入其峭絕處左壁右湍不容一騎將軍參贊一時步進故所貢象竟不能達而烏拉嶺上下百二十里必窮一日之力踰之稍昏黑卽不能覓路且有雪城若門洞深數十丈人往來者不敢語否輒有雪大如屋壓而殛之廓爾喀寇藏時運貨

歸國者二千人過嶺凍死殆盡蓋葱嶺之南脊天所以限中西也險倍金川遠踰回部爲漢唐兵力所未至幸其士卒皆跣足每戰仿古法先約期而後交綏我軍不顧輒先發掩襲往往猝爲我乘自大創以後至今貢獻不絕其國西南與五印度相鄰其南海號印度海近日印度之孟加臘及孟買等國爲大西洋英吉利所屬乾隆六十年英吉利使臣入貢自言前歲大將軍率兵至西藏西南之的密部落時彼國兵船亦曾相助倘嗣後有需用西洋兵者情願効力○朝廷始知前此廓爾喀之役其南界亦有邊警外患也道光二十年英吉利夷人入寇粵浙廓爾喀亦遣人稟駐藏大臣言小國與里底所屬之地相鄰每受其侮今聞里底與京屬構兵京屬屢勝臣願率所部往攻里底屬地以助○天討時駐藏大臣未知所稱里底卽英吉利所稱京屬卽謂中國之廣東省所稱底里屬地卽印度答以蠻觸相攻○天朝向不過問卻之蓋英吉利國都雖遠在大西洋而其屬國印度則與廓爾喀接壤世仇構釁故我攻廓則英夷乘之我攻英則廓夷亦願助之云

廓爾喀界西藏及鄂羅斯攔兩大國之間故內貢中國亦兼貢鄂羅斯近日英夷西與鄂羅斯構兵東與中國結釁故廓爾喀欲乘兩大國之勢以攻印度云印度地產鴉片煙英吉利關稅歲入千萬計其兵船入犯中國者十九皆孟加臘之人誠能聽廓夷出兵之請○獎其忠順擾彼腴疆擣其空虛牽其內顧使西夷失富強之業成狼狽之勢亦海外奇烈也鄂羅斯地袤二萬里與中國首尾相接地大兵強西洋所畏其與我互市之地則有陸而無海英夷之與我互市則又有海而無陸近日鄂羅斯屢與英夷爭達達里之地其地橫互南洋鄂羅斯得之則可以圖併印度故與英夷年年血戰雍正五年俄羅斯攻取西藏西南五千里之務魯木以其地尙佛教遣人至中國學刺麻當卽與廓爾喀相近之地若能許鄂羅斯海舶赴粵貿易聯絡彌利堅佛蘭西等國皆英夷仇敵則英夷之兵舶不敢舍其境而遠犯中國英夷在印度大兵船止百艘以其半入寇中國其餘皆分守各境不敢遠離恐他國乘其虛也夫以夷攻夷之效

思見者視爲迂圖乾隆嘉慶間一封遑羅遂足以西制緬甸東制安南善奕者或一閒著而全局皆生況以宅中馭外之勢制讐讐四結之夷哉

廓爾喀不丹合考

甯波龔 柴著

西藏之南雪山之陽有小國二曰廓爾喀曰不丹向爲中國藩屬廓爾喀本名尼泊爾又稱巴勒布或稱白布廓爾喀乃其別部城名地當孔道貿易殷繁其名獨著東西距一千二百六十餘里南北數百里東界英屬哲孟雄部南界英屬孟加臘亞加拉部雍正九年諸部落各以方物來朝藉得觀光上國恪守藩封乾隆五十六年侵擾後藏陷札什倫布大掠而去相國福文襄公率勁旅征之揮軍深入累戰大捷逼其都城部民震恐環赴大軍乞降獻還所掠○詔許內附自是五年一貢由四川北上至今罔替所統部落凡九尼泊爾卽其首部喀蠻都爲其都城或作加德滿都又作甲曼土地形窄而修幅隕不廣北境雪山峰嶺嵯峨凌摩霄漢川谷煙瘴爲瘴人誤觸之輒多疾惟田土肥沃植產尙饒二麥黍稷棉花丹麥肉寇等物頗足給用其人游牧耕種各守其業身強多力戶口綦繁綜計之約二兆有奇俗尙佛教紅黃喇嘛趾相錯惟不操大權與西藏異乾隆年間英人滅孟加臘乘勝脅攻諸部落望風瓦解獨廓爾喀血戰力禦未遭蠶食嘉慶朝與英人累年構兵各有勝負然輔車無鄰獨支大敵勢亦危矣不丹國在廓爾喀東本名布魯克巴中間僅隔哲孟雄一小部都城名達西蘇敦西藏志作札什曲宗居民僅一兆有餘俗亦尙佛教其地時序融和遠勝西藏湖河交貫橋梁險異習以繩索高懸攀援而過土田肥沃五穀菜果皆宜種植產驢馬牛象棉花大黃黑金紋石等較之蒙古沙磧荒郊相懸天壤東界英屬阿薩密部南至孟加臘西連哲孟雄北峙雪山東西相距約九百五十里南北亦數百里舊分兩族雍正朝互相仇殺先後赴藏投誠貝勒頗羅鼐爲之和解遂各遣使北上奉表貢方物以後百數十年源源而來按時朝貢而我○朝亦恩賜有加優禮款待詎咸豐年間頓懷叛志朝貢中輟○朝廷亦大度含容未加斧鉞蓋叢爾小部往不追而來不拒本無足介懷也第鄰比大邦外無捍禦一旦強鄰興兵構衅今日侵地明日割城

五印度故事將復見於目前矣其可視為緩圖哉

五印度故事將復見於目前矣其可視為緩圖哉

征烏梁海述略

光澤何秋濤著

烏梁海卽明時兀良哈部族在蒙古諸部之北而役屬於蒙古諸部大抵蒙古事游牧非平原曠野弗便也烏梁海事採捕非深山密林弗便也瀚海以外迤南近內札薩克多平原曠野喀爾喀蒙古居之迤北近俄羅斯多深山密林烏梁海居之以故烏梁海種人與俄羅斯尤爲密邇有我○朝所屬之烏梁海歲以五貂貢於我○朝有俄羅斯所屬之烏梁海歲以五貂貢於俄羅斯其附近邊境者又有彼此各取一貂之烏梁海至雍正五年始議停止然俄羅斯仍私征一貂如故我○朝亦姑置勿問也又尼布楚城本我茂明安蒙古舊地其樹林中亦多烏梁海種人康熙二十八年議界割屬俄羅斯然此皆未嘗征所征者乃屬準噶爾之烏梁海也先是札薩克圖汗部人根敦者世居和託輝特其地爲喀爾喀極邊西近厄魯特北近俄羅斯俗喜鬪烏梁海復錯處其間捕貂射獵依木而居納賦於和託輝特有事則藉之爲兵故和託輝特雖隸札薩克圖汗實自爲一部康熙二十五年尙書阿喇尼荏盟承○制授根敦札薩克使領其眾四十四年根敦卒以其嗣子博貝襲札薩克輔國公四十八年○諭曰博貝與厄魯特接壤防守不可不嚴念伊力孤必得族中兄弟助之方克有濟納瑪琳藏布本和託輝特人著授札薩克一等台吉與博貝同居尋○賜牧塔斯郭勒克木克木齊克地厥後還烏梁海人於此因號克木克木齊克烏梁海云五十四年○上以準噶爾策妄阿喇布坦扇眾喀爾喀○命散秩大臣祁里德率大軍赴推河偵禦札薩克博貝從往博貝因言準噶爾不靖恃烏梁海障之乞往招若抗卽以兵取札薩克台吉濟納彌達阿哩雅及根敦羅卜藏兵俱習戰請與同往○上韙其議從之此征唐努山烏梁海之始九月烏梁海頭目和羅爾邁率屬降先是和羅爾邁居吹河嘗以越界射獵爲博貝縛獻○上有其罪○諭還巢至是將遣子瑚洛虎納請降博貝至因遣其游牧赴特斯冬和羅爾邁遁博貝追至噶爾罕什

巴爾執之還五十九年八月大軍自阿爾臺分路進剿準噶爾博貝偕朋素克喇布坦隨征西將軍祁里德由布魯勒進剿至鏗格爾河偵宰桑色布騰率眾據山守大軍分擊之降其屬二千餘並擒烏梁海逃眾四百封多羅貝勒籍準噶爾降眾賜之六十年調車臣汗兵防護烏梁海降眾於巴顏車爾克雍正元年有厄魯特羅卜藏錫喇布者烏梁海人初隸厄魯特和託輝特貝勒博貝擒降之置汗阿林後徙置察哈爾授佐領偕藍翎侍衛春不勒轄其屬至是攜眾叛逃土謝圖汗部札薩克車木楚克納木札勒偕同部札薩克車布登車臣汗部貝勒旺札勒偕同部輔國公車稜旺布札薩克色稜達什等追擒之射斃賊眾阿玉額博壘等○○上嘉悅敘功晉封車木楚克納木札勒爲多羅貝勒以車布登父原爵貝子晉封多羅貝勒封旺札勒多羅郡王尋授副盟長二年正月貝勒博貝來朝○○諭廷臣曰朕詢貝勒博貝管轄烏梁海何以資生據奏在將軍祁里德處借餉一萬八千餘兩買牲分給各得產業今勝於昔所借項伊自以貝勒俸逐年扣抵朕思博貝宣力戎行勳績卓著且烏梁海均朕百姓豈有朕之百姓而借餉於朕之理所借銀兩著不必扣還諭祁里德知之三年和羅爾邁復遁由阿哩克竄準噶爾界博貝遣次子額琳沁由托濟游牧而自赴克木克木齊克緝叛黨誅之四年正月博貝偕策凌奉○○命勘阿爾臺形勝初厄魯特與喀爾喀未構兵時錯處科布多烏蘭固木地噶爾丹既滅喀爾喀西境直抵阿爾臺故自唐努山陰之克木克木齊克至博木等處皆博貝及來歸之厄魯特貝子策稜旺布所屬烏梁海游牧其地至是策妄阿喇布坦奏克木克木齊克舊隸準噶爾乞還○○上弗許慮伺間掠烏梁海○○詔博貝率所部兵千隨前鋒統領定壽駐唐努山湯特斯地防護之尋○○諭理藩院曰朕詳思克木克木齊克烏梁海皆博貝等所屬和羅爾邁既已就擒交博貝撫恤居之公所但念此等人向在喀爾喀邊外林木中射獵爲生與準噶爾所屬烏梁海接壤又與俄羅斯連界宜令博貝等同大臣前往曉諭令自爲豫備

以防不虞著傳諭博貝知之五年博貝率子額琳沁追擒烏梁海逃入和羅爾邁於托濟降其眾雍正八年博貝卒康熙年間征烏梁海之議發自博貝厥後撫輯降眾殫竭心力而唐努山北之烏梁海遂入版圖皆博貝功也乾隆七年○賜札薩克圖汗部一等台吉額琳沁公品級○命轄烏梁海降眾十四年烏梁海降人巴黨遁有烏勒木濟者馳告旺布多爾濟追至貢贊伯勒齊爾盡擒還理藩院議雖擒獲究因疏懈所致停敘功○上以旺布多爾濟聞信疾追奮勇可嘉仍○賜幣旺多布爾濟額琳沁子也尋授二等台吉十六年三月博貝之孫青滾咱卜坐縱屬私與準噶爾互市罪削爵○諭曰青滾咱卜縱所屬人私出汎界與準噶爾回眾貿易以致潛居烏梁海甚屬疏懈且於特諭擒解之喇嘛札木蘭尙未解到怯懦推諉深負朕恩著革副將軍及札薩克貝勒爵朕觀額琳沁人材出眾著襲札薩克多羅貝勒但念青滾咱卜係博貝長孫一旦全削朕心殊爲不忍著即以額琳沁所遺公品級札薩克台吉職令其調補○詔額琳沁議定烏梁海出入汎界例並飭禁所部越境與準噶爾及回眾私市十八年札薩克圖汗部二等台吉達什朋素克隨北路軍營參贊大臣薩拉爾擒私入科布多汎之烏梁海人札木蘭等薩拉爾者厄魯特人初爲準噶爾宰桑乾隆十五年準噶爾內亂薩拉爾率四十七戶投誠○授散秩大臣至是立功○○高宗嘉獎之授內大臣尋○命薩拉爾收烏梁海及札哈沁眾此征阿爾泰烏梁海之始是年杜爾伯特部三車凌來歸十九年二月烏梁海人博羅特瑚圖克等擅入汎界土謝圖汗部札薩克輔國公巴木丕勒多爾濟次子車登三不勒隨參贊大臣薩拉爾擒之有○○詔獎諭薩拉爾遂由崆格進屯卓克索招撫烏梁海青滾咱卜額琳沁等並率兵從旋追擒福木特黨札木蘭等額琳沁尤奮勵薩拉爾以聞○○詔封輔國公二月○○諭成衮札布曰前因軍營無事額駙策凌年老就近以塔密爾作爲軍營今有辦理烏梁海之事軍營應移駐烏里雅蘇臺以塔密爾作爲內地尋與尙書

舒赫德議防秋○詔來京面授方略三月以收撫烏梁海○詔桑齋多爾濟著所部副將軍偕車布登率諸部兵親隨成衮札布駐防鄂爾海喀喇烏蘇尋偕參贊大臣安崇阿德甯等移駐庫克嶺九月青滾咱卜及土謝圖汗部札薩克台吉三都布多爾濟各以兵千隨參贊大臣努三等赴阿勒和碩偵烏梁海宰桑赤倫遁吹河乃率兵由喀喇莽奈直抵所居降其眾四百四十五戶徙所屬台吉班札喇克察於特斯偉衮安置之薩拉爾又率額琳沁車布登札布貢格敦丹車木楚克札布等勦撫烏梁海宰桑達克車根等於察罕烏蘇尋復擊宰桑禰木特及通禰木特降之十一月敘功晉封青滾咱卜郡王品級復授所部副將軍二十年正月烏梁海降臣察達克招包沁種人來歸並察獲杜爾伯特所屬以獻○詔給所部敘功授察達克內大臣七月固爾班和卓等賊眾千餘戶潛通烏梁海誘同逃大軍猝與遇分路掩擊肅誅之先是班第之勦達瓦齊於伊犁也遁出阿爾臺以烏梁海潛附準噶爾遣車布登沿途勦捕至固爾班鼐塔克及烏蘭布拉克喀喇哈巴地遇烏梁海副都統察達克屬得木齊綽罕宰桑圖布慎屬得木齊喀喇曼濟等眾盡降之並獲叛賊巴朗從賊二百餘戶師旋車布登偕副都統敦多卜率兵三百由薩噶勒巴什嶺往收汗烏梁海汗即烏梁海所居地也宰桑郭爾卓輝鄂木布及布魯古特宰桑根都什特楞古特宰桑瓜齊楞皆率眾降青滾咱卜又招降宰桑齊巴漢等自是烏梁海地略定編新降旗分補授總管以青滾咱卜習烏梁海情命總轄之先是巴朗叛逃青滾咱卜追至和通鄂博率兵還言巴朗由西路額琳哈畢爾噶遁故追不及至是巴朗就擒青滾咱卜言盡妄○諭責之尋烏梁海逸賊戕守汎侍衛貝多爾時齊巴克札布率兵駐防奇爾吉斯諸爾即偕根敦往捕至察罕烏蘇遇青滾咱卜自伊犁歸與合兵赴巴斯庫斯收撫烏梁海時舊屬準噶爾之烏梁海散居汗哈屯等處青滾咱卜宣揚○○上命於是各宰桑曰哈爾瑪什曰瑪濟岱曰納木札勒曰保衮曰莽噶拉克曰納穆克布曰珠庫鄂木等相

繼降敘功車布登封多羅貝勒齊巴克札布公品級九月○○諭青滾咱卜率烏梁海兵隨參贊大臣哈達哈勦阿逆方大軍之勦達五齊也青滾咱卜與阿逆同隊交其暱定北將軍班第與參贊大臣薩拉爾密奏阿睦爾撒納逆狀青滾咱卜微聞之私以相告阿逆既叛青滾咱卜潛遣烏梁海人諾爾布丹津赴阿逆所至是事發○○諭哈達哈擒解來京未幾○○上追念其招撫烏梁海功○○宥弗究會烏梁海賊郭勒卓輝博博等譌傳阿逆煽哈薩克阿布賚汗入寇仍○○命青滾咱卜以參贊大臣隨哈達哈進勦二十一年三月以阿睦爾撒納煽烏梁海梗哈薩克道○○詔札哈沁公札木禪從哈達哈勦烏梁海叛賊有固爾班和卓者奇爾吉斯宰桑也攜千餘戶潛赴烏梁海車布登札布及車登三不勒等邀擒之因進兵哈薩克界五月達爾齊雅及納木札勒齊蘇囉等由海喇蘭伯勒齊爾旺勦烏梁海之倡亂者追至庫楚克及哈達什伯根斬獲甚眾大軍抵烏梁海青滾咱卜私攜所部兵還牧搆逆且遣人赴烏里雅蘇臺軍煽眾喀爾喀令散歸輝特逆賊普爾普德濟特等由固都爾格叛逃齊巴克札布追擒之復隨參贊大臣納穆札爾捕烏梁海逃眾至阿固特賊逸尾擊之歿於陣事聞○○諭曰齊巴克札布歿於行陣深堪嘉憫著追封輔國公賜銀三百兩治喪視一品大臣例賜祭葬入祀昭忠祠其子巴圖濟爾噶勒襲爵並授札薩克○○詔貢楚克札布由翁吉達什和碩解內札薩克馬納烏里雅蘇臺自青滾咱卜屢干重譴○○上不忍置之法○○恩宥者三至是叛蹟顯著不可復追○○諭廷臣曰青滾咱卜受朕恩最深去歲將軍大臣參奏阿逆伊敢私自漏洩百計趨承以致阿逆趾高氣揚肆行無忌後於追緝之時觀望退縮妄言必得兩路出師五萬方可追擒種種乖謬指不勝屈前此屢欲擒治念伊祖傳貝夙著勤勞施恩寬宥今無故自軍營擅歸又揚言額琳沁多爾濟達木巴札布等治罪之後眾心疑懼而喀爾喀數年以來皆以用兵爲累以其怨望之私託爲他人之說妄行瀆奏藐法已極斷難姑容必當明正典刑以

示懲戒著傳諭舒明阿蘭泰如已歸游牧可諭哈達哈等旋師往勦如至舒明所駐地方卽降旨擒解青滾咱卜之叛造僞符撤汎兵眾札薩克多爲所惑延不勒多爾濟子旺沁多爾濟等並棄汎歸牧土謝圖汗部貝勒達什不勒亦慮所屬游牧被掠由烏里雅蘇臺軍營私歸尋覺其詐督兵護臺汎獨桑齊多爾濟飭所屬安伍察獲台吉阿雅喇所匿僞符札薩克圖汗部台吉遜篤布與車臣汗部札薩克台吉成袞札布亦察其詐安堵如故初遜篤布等以檄由德沁札布所至疑與青滾咱卜通以聞○諭曰僞檄流傳或係他人假冒德沁札布之名亦未可定著加恩免究飭令速歸舊汎接理驛務毋自貽誤遜篤布督兵嚴守各汛誓以死拒事聞○諭曰喀爾喀王公等爲青滾咱卜所煽多擅離職守遜篤布等特一札薩克台吉耳獨明大義不肯附逆誓死効力朕甚嘉之○賜公品級以示獎勵○詔獎桑齊多爾濟之能授北路參贊大臣○命往諭烏梁海總管赤倫協擒青滾咱卜時汗哈屯烏梁海眾附青滾咱卜叛○詔杜爾伯特汗車凌率兵從勦自諸札薩克棄汎後驛路中梗軍書旁午不得達經過官吏輒遇害車木楚克札布督兵續遞文報同部三等台吉噶瓦供給牲畜爲之護送且多捐馬助驛用諸汎之路始通○詔晉封車木楚克札布多羅貝勒○賜噶瓦公品級○諭達什不勒曰昨聞達什不勒私歸游牧朕卽料其不過爲浮言所惑今果知悔悟率兵接遞驛務前咎不足深責仍加恩晉封郡王品級但驛站旣係新設非加意巡察恐有遲誤著達什不勒會同總管達松阿等悉心辦理七月宣○諭喀爾喀王公等曰青滾咱卜係獲罪斥革之人復加恩令襲貝勒並授副將軍去歲從征伊犁封授郡王稍有人心自當圖報孰意深負朕恩實出情理之外此次辦理烏梁海授爲參贊予以自新之路伊至烏梁海並未擒獲鄂木布郭勒卓輝等卽撤兵還雖自有哈達哈率兵往勦伊卽退還無關輕重但旣爲參贊並不奏請諭旨亦未咨報將軍率兵擅還律以軍法罪不容誅且妄造浮言煽惑眾聽其心實不可問試

思辦準噶爾一事原爲喀爾喀經理長久之計命將與師以期一勞永逸然選派爾部官兵俱經實給錢糧米石購辦牲畜何次不給價值而伊乃以連年用兵爲累是誠何心至軍營賞罰乃國家憲典所必行達木巴札布係管理杜爾伯特游牧之人縱令巴朗遁走諱匿不報額琳沁多爾濟監視阿逆來京明知叛蹟已著袖手旁觀致令免脫二人情罪斷無可逭然猶不忍加以顯戮令其自裁此而曲爲寬貸國法何在伊乃謂成吉思汗裔向不治罪此語舛謬更甚如朕宗室中有犯刑章者朕又何嘗廢法邪至於稍知奮勉如巴雅爾什第桑齊多爾濟及車布登札布等則優封顯秩賜賚便蕃伊甯不聞之邪本應除其屬眾削其封爵朕始終眷念舊勳不忍遽令漸滅所有貝勒爵仍著施恩以額琳沁子輔國公旺布多爾濟承襲先是眾喀爾喀爲青滾咱卜所煽棄汛私歸或乘間肆劫青滾咱卜又分遣其黨誘厄魯特貝子朋素克公丹拜及烏梁海總管赤倫察達克等與同叛及聞○聖諭無不悔悟乞罪七月○詔旺布多爾濟就近擒獻青滾咱卜○諭曰逆賊青滾咱卜背恩叛逆所襲之爵自不應復令承襲但念此爵本係博貝所襲且效力有年不忍遽削著加恩卽令旺布多爾濟晉襲青滾咱卜所屬盡轄之會哲布尊丹巴呼圖克圖以青滾咱卜悔罪乞宥具奏○詔弗許青滾咱卜竊懼爲擁兵自衛計脅所屬曰伊克和託輝特曰巴罕和託輝特曰明噶特曰哈柳沁曰託斯曰奢集努特六鄂拓克及烏梁海十六鄂拓克附已大兵至皆棄去青滾咱卜攜孥由託濟走斯吉特謀遁俄羅斯○諭旺布多爾濟爾必無與逆賊同謀之事朕可深信昨據貝勒車布登札布屬人告稱逆賊令遷爾游牧爾雖聽從并非有心附之今大兵已抵和託輝特爾若能擒獻朕必加重賞否則率屬速赴軍營既可永受朕恩且不墮爾祖博貝舊勳况青滾咱卜屬人不過脅從若棄之來歸概免治罪爾其熟思審慮善自爲計毋貽後悔十一月成衮札布遣參贊大臣納穆札爾輕騎往追青滾咱卜旺布多爾濟亦率兵從至杭哈將噶斯擒青滾咱卜及其

子曰東蘇隆多爾濟曰齊旺札布巴里械送○京師賊平解德沙札布參贊大臣職十二月○諭曰親王成衮札布奉命討罪實心效力迅奏膚功朕甚嘉之著賞杏黃帶封伊第四子占楚布多爾濟爲世子以獎忠勤成衮札布奏和託輝特屬六鄂拓克并烏梁海十六鄂拓克聞大兵至卽解尙知感戴和託輝特輔國公旺布多爾濟係貝勒博貝嫡嗣輔國公多爾濟車登台吉達什朋素克係博貝從子皆未附逆請令轄青滾咱卜屬至車登札布助逆時台吉諾爾布曾經諫沮弗聽乃率眾台吉馳赴烏里雅蘇臺軍汎訴世受○國恩誓不從賊因率屬由博羅哈卜齊爾赴察罕託輝游牧供應駝馬亦極奮勉請授札薩克令轄車登札布屬席伊等不致離析各札薩克知感自必嚴加鈐束○詔獎協機宜如議行二十二年正月青滾咱卜伏誅○特旨宥其幼子巴里八月車木楚克札布偕唐喀祿奏言杜爾伯特貝勒巴圖博羅特公舍稜台吉阿喇善等通阿逆走額爾齊斯不從其汗車凌徙牧臣等偵得狀偕副都統瑚爾起馳赴輝巴郎山後擒巴圖博羅特並勦烏梁海賊五十戶乃旋兵赴塔爾巴噶臺緝哈薩克錫喇○諭嘉其能和衷且協機宜以○御用佩飾賜之飭敘加級九月○諭車木楚克札布偕車布登札布招降烏梁海宰桑博和勒納木札勒等車布登札布奏請遣烏梁海內大臣察達克往招之并由布延圖軍選兵策應○上覽其議於是察達克率兵四百往招車木楚克札布檄布延圖兵百繼進盡降之有特勒伯克札爾納克者阿勒坦諾爾之烏梁海宰桑也聞之亦攜屬至○詔車木楚克札布定貢賞例宣示○德意此阿爾泰諾爾烏梁海歸附之始十二月○諭曰車木楚克札布數年宣力戎行勤勞懋著近復招降烏梁海善爲撫納著晉封多羅郡王二十二年先是杜爾伯特及烏梁海未內屬錯牧額爾齊斯後杜爾伯特諸台吉游牧札克拜達里克初徙牧額克阿喇勒再徙額爾齊斯烏梁海就撫以烏蘭固木地給之車凌等復請由額爾齊斯往徙遣都統納木札爾往勘杜爾伯特及烏梁海牧界車凌復

請以烏蘭固木爲屯耕地而游牧於科布多額克阿喇勒○允之○詔嚴禁所屬勿攘竊尋以錯牧不便定烏蘭固木爲杜爾伯特牧別以科布多爲烏梁海牧車凌謀明噶特烏梁海眾叛竄哈喇哈爾榜復遣兵剿之○詔酌賞從軍弁兵免追從征達瓦齊所給駝馬有察袞者車凌增也附阿逆叛聞追軍至竄和落霍斯河爲達什所擒獻論誅宥其妻給車凌準噶爾竄黨有額爾克勝者準噶爾二十四鄂拓克之一也既降尋叛謀竄俄羅斯有不從者二人中道脫歸至車凌所以告車凌以其一械送科布多軍以一給輝特札薩克袞布爲導令率兵六十往剿袞布馳踰阿爾臺遇賊於杭愛海圖擒斬其男俘妻女歸無脫者○獎賜茶幣二十三年春車木楚克札布奏偕察達克勘烏梁海戶口其得秦有十餘戶二十餘戶不等分置得木齊及收楞額等員請並戶少者約四十戶編得秦一○上知其悉烏梁海情○詔如所請四月烏梁海總管阿拉善攜戶百餘叛逃車木楚克札布率札薩克圖部公多岳特追捕有車根者亦烏梁海總管也縛獻阿拉善收其眾又有烏梁海人恩克叛逃○命成袞札布調諸部兵悉擒其屬眾並○賜銀幣尋○諭札薩克圖部公多爾濟車登偕參贊大臣福祿緝烏梁海劫賊布爾古特布格等擒之並蒙○獎賚時烏梁海賊阿木古朗等劫馬札薩克圖部札薩克達什朋素克護所屬福祿効之○詔削札薩克留軍效力尋隨福保追擒阿木古朗等賞於法○詔宥前罪仍授札薩克恩克等之叛竄也其屬已就擒惟恩克未獲九月車木楚克札布謀恩克竄哈屯河疏請暫歸阿勒和碩屯駐冬雪後賊必就擒○許之十二月車木楚克札布果擒恩克○賚幣是年烏梁海種人明噶特叛定邊左副將軍成袞札布檄杜爾伯特札薩克輔國公巴圖蒙克追剿之明噶特舊爲厄魯特屬以大軍定伊犁乞降○詔置之黑龍江之呼倫貝爾既而由納林喀喇泥叛遁巴圖蒙克追之遇諸烏蘭固木河環以兵不卽降中夜圍稍懈賊乘間逸成袞札布効之○上以杜爾伯特部新附且聞檄卽以